

**Sanaartornermi neqerooruteqartarneq pillugu Inatsisartut inatsisisaattut siunnersuut
(Ineqarnermut, Attaveqarnermut Angallannermullu Naalakkersuisoq)**

pillugu

Ineqarnermut Attaveqarnermullu Ataatsimiititaliap

ISUMALIUTISSISSIONAA

Inatsisisatut siunnersuut aappassaaneerneqarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq, Olga P. Berthelsen, Inuit Ataqatigiit, siulittaasup tullia
Inatsisartunut ilaasortaq Anders Olsen, Inuit Ataqatigiit
Inatsisartunut ilaasortaq Kim Kielsen, Siumut,
Inatsisartunut ilaasortaq Ruth Heilmann, Siumut, sinniisussaq

Ulloq 6. oktober 2009-mi siullermeerinerup kingorna ataaatsimiititaliap siunnersuut erseqqinnerusumik naliliiffigaa, imalu oqaaseqaateqarniarluni:

Siunnersummut tunuliaqutaasut

Sanaartornermut tunngasuni neqerooruteqartitsisarnermi siunissami tunngavissat inatsisisatut siunnersuutikkut matumani pineqartukkut aalajangersarneqartut, taamaalillunilu sanaartornermut tunngasuni neqerooruteqartitsisarnermut maanna inatsisaasoq, suliariumannittussarsiuussisarnermut inatsit 1992-imeersoq, Inatsisartut inatsisaat nr. 3, 6. april 1992-imeersoq taarserneqartoq siunnersuuteqartup oqaatigaa.

Sanaartugassat suliariumannittussarsiuunneqarnissaat pillugu piumasaqaammik suliariumannittussarsiuussisarnermut inatsit imaqanngitsoq aammalu inatsit tassatuaasoq periusissat pillugit inatsit, tassanilu suliariumannittussarsiuussinermi neqerooruteqartitsinissap atorneqarnisaanik toqqaasoqarsimatillugu suliariumannittussarsiuussinermi periuserineqartussanut maleruagassat aalajangersarneqartut siunnersuuteqartup oqaatigaa.

Inatsisisatut siunnersuut una pisortat sanaartugassaannut aammalu sanaartugassanut pisortanit tapiiffingineqartunut isumaqatigiissutinut atuuppoq. Siusinnerusumut sanilliullugu

neqerooruteqartitsisut namminersortut siunnersummi matumani maleruagassanik atuinissamut pisussaaffeqanngillat, taakkuninngali atuinissamut periarfissaqarlutik.

Sanaartortitsisut namminersortut isumaqtigisiissuteqarfigisassaminnik toqqaanermanni niuernermik nalinginnaasumik tunngaveqartarpuit, pisortalli aningaasalersugaannik sanaartortoqartillugu qitiutinnejartut taakkuuneq ajorput, tassa pisortat oqartussaasut inuiaqtigiiinnut tunngasut assigiinngitsorpassuit isumagisassaralugillu mianerisassarimmatigit.

Pisortat sanaartugassaataannut neqerooruteqartitsissatillutik tunngaviit pingarnerit sanaartortitsisut siunissami malitassaat inatsisissatut siunnersummi allassimapput. Neqerooruteqartitseriaatsit inatsisissatut siunnersummi atorneqartut tamakkuninnga ingerlatseriaatsinik ilisimaneqareersunik aallaaveqarput.

Tusarniaanermiit akissutit

Siunnersuutip ataatsimiititaliami suliarineqarnerani atugassatut tusarniaanermut akissutit nuutinneri ataatsimiititaliap piniarpai. Kiisalu tusarniaaneq pillugu allakkiamik ataatsimiititaliaq tigusaqarpoq.

Siunnersummik suliarinninneq

Inatsisartuni siullermeerineremi siunnersuut ilalerneqarluartoq ataatsimiititaliamit maluginiarneqarlunilu paasineqarpoq siunnersuut matumani pineqartoq assut isumaqtigisiissutaasoq.

Neqerooruteqartitsisarnermut tunngasumik suliassanik pisariusunik eqqartuussivimmut assingusumik aalajangiisinggaasumik ilinniakatigut immikkut ilisimasalinnik inuttaqartussamik Neqerooruteqartitsineremi Maalaaruteqartarfimmik Naalakkersuisut pilersitsinissaanerat pillugu siunnersummi aalajangersagaq assut iluarisimaarneqartoq ataatsimiititaliap aamma maluginiarpaq.

Taamatuttaaq sanaartugassat § 1, imm. 2-mi pineqartut sanaartorneqarneranni ilinniartoqassanersoq pillugu Naalakkersuisut maleduagassiorsinnaanerat siunnersuutikkut matumuuna periarfissinneqarpoq. Ataatsimiititaliap paasinninera malillugu siunnersuuteqartup taama piginnaatitsissuteqarnikkut anguniagaa pingarneq tassaavoq kalaallinik sanasunik ilinniartitsinerup siuarsarneqarnissaa.

Aalajangersagaq taanna pillugu Unammilleqatigiinnermut Nakkutilliisoqarfik tusarniaanermut ilanngussaa ataatsimiititaliamit maluginiarneqarpoq. Aalajangersagaq taanna nunat allat neqerooruteqartitsisarneq pillugu inatsisaannut sanilliulluni immikkut illuinnartoq Unammilleqatigiinnermut Nakkutilliisoqarfik isumaqarpoq. Unammilleqatigiinnermut Nakutilliisoqarfik aamma isumaqarpoq isumaqtigisiissutissat unammillissutigilluarneqarnissaat aalajangersakkap pinngitsoortissinnaagaa, taamatummi piumasaqaateqarnikkut neqeroorute-

qarusuttut ikilisinnaammata. Taamaattumik neqerooruteqartitsisarneq pillugu inatsimmi nalinginnaasumik piumasaqaataanera peerlugu ilinniartoqarnissamik piumasaqaat suliassanut nassuaatini ataasiakkaani ilangunneqarnissaa Unammilleqatigiinnermut Nakkutilliisoqarfip kaammattutigaa.

Tassunga atatillugu illuliassanut sanaartugassanullu neqeroortitsisarneq pillugu Namminersornerullutik Oqartussat nalunaarutaanni nr. 15-imi, 5. juli 2007-imeersumi maleruagassat neqerooruteqartitsisarnermut inatsit naapertorlugu aalajangersarneqartut inatsillu taanna aqqutigalugu atorunnaarsinneqartut aqutsinikkut aalajangersagaq aqqutigalugu ingerlatiinnar-neqarnissaannik Naalakkersuisut aalajangererat ataatsimiitaliamit taperserneqarpoq.

Tamanna tunngavigalugu **ataatsimiitaliap isumaqatigiittup** siunnersuut Inatsisartunit
akuersissutigineqassasoq inassutigaa.

Taama oqaaseqarluni Ineqarnermut Attaveqarnermullu Ataatsimiitaliap inatsisissatut siunnersuut Inatsisartunut aappassaaniigassanngortippaa.

Justus Hansen,
Siulittaasoq
Demokraatit

Olga P. Berthelsen,
Siulittaasup tullia
Inuit Ataqatigiit

Anders Olsen
Inuit Ataqatigiit

Kim Kielsen,
Siumut

Ruth Heilmann,
Siumut